

拗枉 江秀鳳(四縣腔)

逐儕人都共樣，一世人盡惱分人拗枉，自家有做差，分人罵、分世大人打就無相干，分人拗枉正經會闕死。

還細時節，有一個好朋友生日，該央時當時行溜溜球，厓去店肚尋著一粒無打價數个，想講送人東西打價數無禮貌，拿到櫃台績分頭家娘罵，佢拗枉厓摺價數擘忒，本來當譴，無想愛摺佢買，毋過斷烏仔，戴太平算較庄下，屋下附近又無別間店，朋友天光日生日，無奈何還係摺佢買，這毋係麼該大事情，毋過分人拗枉心肝就會艱苦，貼貼記到這下，就毋會毋記得。

頭擺个公車，在運轉手脣項有一隻箱仔愛分人放銀角仔做車錢，係無銀角仔，多放佢乜毋會找錢，係正經無零星，乜識看人放一張一百個銀，放一百個銀乜無人會摺你講恁仔細。

有一擺坐公車，過紅青燈就愛下車仔，厓摺錢放到箱仔肚，車仔堵堵好停紅燈，過無一分鐘，厓愛下車个時節，運轉手硬硬講厓無放錢，厓明明就有放，還誑誑滾有聲，緊同司機解釋，佢還係大嫲聲緊咄，歸車頂个人都緊看厓，該央時正經當闕，仰恁衰會堵著這種司機，相信坐到頭前个人乜有看著厓有放錢，仰會無半儕人有義氣，代厓講一句話？

該擺係吾姆喊厓去阿姨屋下送禮，毋記得係麼該年節，這隻司機還孤毛，乜無想厓係細人仔，佢講無放錢就毋分厓下車，車門乜毋開，高不將再搵一擺錢，正開門分厓下車，分人拗枉又譴又瀉面子，闕到會死。好得吾姆逐擺交代厓出門抑係買東西就會加拿錢分厓，兼怕毋罅會害厓為難。

有一擺踉阿姆共下去看厥降嬰兒仔个朋友，該時代 lin\go\ 貴參參仔，該間生理當好，人盡多，吾姆買 5 粒 lin\go\，使忒三百零銀，稱好斤兩檢忒錢，盲行到店外，頭家就大嫲牯聲咄：「該隻著青衫个太太，你有檢錢無？」厓摺吾姆幹轉頭看係麼儕買東西無檢錢，無想著頭家用蛇頭指緊剷吾姆：「就係你、就係你，你有檢錢無？」吾姆行倒轉去好聲好氣摺頭家講：「有檢錢，毋信你稱看哪，這總共幾多斤，厓檢忒幾多錢，你自家稱看哪著無？」頭家摺油紙袋仔大大力搶過去，稱頭稱一下，摺吾姆講个共樣共樣，就攞還吾姆，一句失禮就無講，厓看到佇毋著：「做生理人恁惡，又恁無禮貌，自家拗枉人，連會失禮就無，下二擺厓兜絕對毋會過來若店項買東西哩！還魯夫个生理人。」

講忒，吾姆牽等吾手，定定仔行過當多人客面前過，這擺大家嘎用當尊敬个眼光看厓，代阿姆出一口氣，厓乜試著盡風神。

2018.5.9 台中 55 路公車頂